

PREDMET: POZIV NA OKRUGLI STO

„Unaprijeđenje pristupa pravdi-Podrška uspostavljanju sistema besplatne pravne pomoći u BiH“

**Koji će se održati dana 17.04.2012.godine, utorak, sa početkom u 11:00 sati,
u Hotelu Hollywood Ilidža Sarajevo**

Bosna i Hercegovina je bez sumnje u konačnoj fazi poslijeratne rekonstrukcije i transformacije u moderno demokratsko društvo koje mora osigurati najviši nivo zaštite ljudskih prava svih svojih građana u skladu sa međunarodnim standardima i normama. Gledajući postojeće političke i ekonomske probleme, te nedostatak ujednačenih mehanizama za pružanje besplatne pravne pomoći na čitavoj teritoriji države, postaje neophodno da se obezbijedi nepristrasan i jednak pristup pravima kroz usluge besplatne pravne pomoći koje su nezavisne od državnog uticaja. Uspostava minimalnih standarda i jačanje kapaciteta pružaoca besplatne pravne pomoći je i jedan od strateških ciljeva Strategije za reformu sektora pravosuđa 2008-2013.

Bosna i Hercegovina, na državnom nivou, još nije donijela Zakona o besplatnoj pravnoj pomoći. Zakoni koji regulišu pristup besplatnoj pravnoj pomoći jedino su doneseni u Republici Srpskoj te u nekim kantonima Federacije BiH. Njihova primjena i efekti su limitirani na određeni teritorij i na određene pravne postupke, a ostvarivanja prava na besplatnu pravnu pomoć građanima lošeg imovnog stanja dodatno je uslovljeno ispunjavanjem određenih uslova.

U poslijeratnom periodu, ugroženo stanovništvo, nije moglo samo da se adekvatno nosi sa svim preprekama u pristupu pravima koje su se postavljale. Kako se radilo o osobama koje su posebno ekonomski ugrožene, oni nisu mogli da plaćaju usluge advokata. Nastalu potrebu i prazninu usljed nepostojanja državnih sistema besplatne pravne pomoći za ugrožene kategorije stanovništva, popunile su nevladine organizacije za zaštitu ljudskih prava i mali broj advokata koji su pružali besplatnu pravnu pomoć. Obezbeđivanje i pružanje besplatne pravne pomoći za hiljade korisnika, u periodu koji je uslijedio nakon prekida sukoba, bilo je moguće zahvaljujući finansijskoj podršci i sredstvima međunarodnih donatora. Iako je postojala obaveza države da obezbijedi pravnu podršku i pomoć za ugroženo stanovništvo, odnosno da se olakša pristup pravima, nevladine organizacije su se pojavile kao jedini partner međunarodnoj zajednici za ovakav vid podrške i pružanje besplatne pravne pomoći.

Zbog specifičnosti položaja ugroženih kategorija stanovništva i kompleksnih pravnih problema, nameće se potreba organizovanja pristupa adekvatnoj stručnoj pravnoj pomoći kroz uspostavu djelotvornog sistema besplatne pravne pomoći.

Kako je Udruženje „Vaša prava BiH“ do sada imalo iskustva u pružanju besplatne pravne pomoći, namjera je organizatora otvoriti stručnu raspravu u vezi sa donošenjem Zakona o besplatnoj pravnoj pomoći, čijim usvajanjem bi se omogućio efektivan i efikasan pristup pravdi ugroženim kategorijama stanovništva.

Stoga nam je zadovoljstvo da Vas pozovemo da uzmete učešće na ovoj sesiji. Molimo vas da vaše učešće potvrdite na broj telefona 033/789-105 ili e-mail adresu dinoa@vasaprava.org i draganv@vasaprava.org.

Udruženje „Vaša prava BiH“
Emir Prcanović, Izvršni direktor

